

## **Perlis tetapkan zakat fitrah RM7**

**Astro Awani**

**22 Mac 2023**

**Bernama**

KANGAR: Majlis Agama Islam dan Adat Istiadat Melayu Perlis (MAIPs) menetapkan bayaran zakat fitrah di negeri ini kekal dengan kadar RM7.

MAIPs menerusi kenyataan hari ini memaklumkan kadar tersebut diperkenankan Raja Perlis Tuanku Syed Sirajuddin Jamalullail setelah mendapat nasihat daripada Persidangan Mesyuarat MAIPs yang telah memperakukan keputusan Jawatankuasa Fatwa Negeri Perlis bahawa ia berdasarkan harga beras yang lazimnya digunakan oleh masyarakat.

Menurut kenyataan itu, Raja Muda Perlis Tuanku Syed Faizuddin Putra Jamalullail telah berkenan berangkat melancarkan kadar berkenaan di Kem Rejimen 504 Askar Wataniah, Bukit Keteri, hari ini.

"Selain bayaran tunai melalui Amil MAIPs, umat Islam yang ingin menunaikan zakat fitrah dengan beras, boleh mengeluarkannya sebanyak satu gantang Nabawi bagi setiap seorang yang bersamaan dengan berat 2.6 kilogram," titah Tuanku Syed Faizuddin Putra yang juga Yang Dipertua MAIPs.

Turut mengiringi baginda, Menteri Besar Mohd Shukri Ramli dan Setiausaha Kerajaan Negeri Datuk Seri Hasnol Zam Zam Ahmad.

Sementara itu menerusi kenyataan sama, Ketua Pegawai Eksekutif MAIPs Mohd Nazim Mohd Noor berkata setiap orang Islam yang tinggal di Perlis wajib mengeluarkan zakat fitrah sepertimana yang ditetapkan bagi dirinya, anak isteri, begitu juga tanggungannya.

"Umat Islam boleh mengeluarkan zakat fitrah melalui amil-amil kariah di seluruh negeri Perlis serta turut boleh menunaikannya dalam talian melalui laman portal MAIPs di [www.maips.gov.my](http://www.maips.gov.my)," katanya.

-- BERNAMA

**© 2023 Astro AWANI Network Sdn. Bhd. 200001032668(535275-D) All Rights Reserved.**

Source: <https://www.astroawani.com/berita-malaysia/perlis-tetapkan-zakat-fitrah-rm7-411956>